

四庫全書

子部

# 欽定四庫全書

子部

古今事文類聚新集卷三

四

詳校官中書臣沈 颺

侍讀臣孫球覆勘

總校官編修臣王 燕 緒

校對官中書臣王 家 賓

謄錄監生臣徐 錫 福

欽定四庫全書

古今事文類聚新集卷三

元 富大用 撰

三公部

太尉

歷代沿革堯時舜為太尉秦時金印紫綬掌武事漢惠  
帝六年置太尉官孝文三年置七年省武帝建元二  
年置五年省元狩六年法周制更名大司馬世祖建

武二十七年罷大司馬復置太尉靈帝末以劉虞為  
大司馬而太尉如故齊太尉品第一梁武初同宋齊  
之舊有太尉後齊置太尉司徒司空為三公後魏有  
大將軍不置太尉正光以後並置唐太尉一人宋仍  
唐舊政和二年御筆改太尉為武選一品之任在節  
度使上元以太尉司徒司空為三公

羣書要語孟夏之月命太尉贊傑俊選賢良舉長大行  
爵出祿必當其位月令掌四方兵事功課歲盡即奏其殿

最而待賞罰凡郊社之事掌亞獻凡國有大造大疑則與司徒司空通而論之國有過事則與二公通諫諍之

注本

三公星在北斗杓南主宣德化和陰陽若今之太尉

司空之象也

天丈錄

詩句對綦陪謝傳把劍覓徐君

杜別房太尉墓

家呼小太尉國

號大涼公

杜牧時李晟官至太尉子愬亦贈太尉

古今事實

憂心如醉

劉寬為太尉常於坐被酒睡伏靈帝問曰太尉醉耶對  
曰臣不敢醉但任重責大憂心如醉

冲心愈約

郝鑒為太尉雖在公位冲心愈約勞謙日昃誦玩墳索  
自少至長身無擇行

有不貳心

冲帝詔書曰太尉趙峻二世掌典樞衡有匪石不貳之  
心

有三不惑

楊秉為太尉嘗曰我有三不惑酒色財天下稱為名公

忠正不撓

冲帝詔書曰三公國之楨幹朝廷取正以成斷金大司  
農李固公族之苗忠正不撓有史魚之風其以固為太  
尉

恭慎自守

王龔為太尉在位恭慎自守非公事不通州郡書記其

所辟命皆海內長者

左袒安劉

漢高祖疾甚呂后問大臣上曰周勃重厚少文然安劉氏必勃也可令為太尉帝崩呂氏謀為亂太尉勃持節入北軍呼曰為劉氏者袒左為呂氏者袒右軍皆袒左為劉氏

入租助國

張禹為太尉時連歲灾荒府藏空虛禹上疏求入三歲



租稅以助郡國廩假

觸目琳琅

有人詣王太尉遇安豐大將軍丞相在往別屋見秀眉  
平子還語人曰今日之行觸目琳琅與珠玉

世說

每顧髮監

唐宣宗卽位李德裕奉冊太極殿帝退謂左右曰卿行  
事近我者非太尉耶每顧我毛髮為森監翼日罷為檢  
校司徒同中書門下平章事

奏劾近官

楊秉除太尉時中常侍侯覽弟參為益州刺史累有贓罪  
暴虐一州秉劾奏參檻車徵詣廷尉參惶遽自殺秉因  
奏覽及中常侍具瑗書奏尚書召對秉掾屬曰公府外  
職而奏劾近官經典漢制有故事乎秉使對曰春秋趙  
鞅以晉陽之甲逐君側之惡傳曰除君之惡惟力是視  
漢世故事三公之職無所不統尚書不能詰

單坐使人

靈帝以羊續為太尉時拜三公者皆輸東園禮錢千萬令中使督之名曰左騶其所之往輒迎致禮敬厚贈賂續乃坐使人於單席舉縕袍以示之曰臣之所資惟斯而已左騶白之帝不悅以此故不登公位注騶騎士也

### 不受遺金

太尉范隆曾有所薦得美官者於闇中以金遺隆隆數而責之言人不知也謹不敢漏泄父母兄弟隆曰神已知之其可欺耶遂絕之

崔鴻前  
趙錄

還所賜物

李咸孤特自立自大鴻臚拜太尉自在相位約身率下  
常食脫粟飯醬菜而已刺史二千石牋記非公事不發  
省以先乞骸骨見許悉還所賜物乘敝牛車而去

白鹿隨車

鄭弘為臨淮太守行春有兩白鹿隨車挾轂而行弘恠  
問主簿黃國鹿為吉凶國拜賀曰聞三公車圖畫作鹿  
明府當為宰相後果為太尉

飛鵲墮印

後漢常山張顥為梁相天新雨後有鳥如鵲飛翔稍下墮地人取化為一圓石顥椎破之得金印曰忠孝侯印顥表上聞藏之秘府靈帝時至太尉

博物志

使者八至

晉桓溫授侍中太尉固讓不受旬月之間使者八至輅車相望於道

公台三登

胡廣在公台三十餘年歷事六帝禮任甚優凡一履司  
空再作司徒三登太尉又為太傅其所辟命皆天下名  
士

以副衆望

孫皓詔曰范曄勲德俱茂朕所倚憑宜登上公以副衆  
望可為太尉

為立五廟

唐李晟為太尉詔為晟立五廟官給牲牢祭器牀帳禮

官相儀以稱焉後李晟子翹亦為太尉

楊氏四世

楊震秉賜彪四世為太尉德業相繼為東京名族

唐興七人

唐李德裕拜太尉固讓言唐興太尉惟七人臣願守舊秩足矣帝曰吾恨無官酬公無固辭

金章紫綬

齊太尉品第一金章紫綬進賢三梁冠絳朝服佩玄玉

玄衣纁裳

晉制郊廟太尉冕服七旒衣纁裳服七章

置屏隔坐

鄭弘少為鄉嗇夫太守第五倫行春見而奇之召署督郵後弘為太尉時舉將第五倫為司空班次在下正朔朝見弘曲躬而自卑帝問之知其故遂聽置雲母屏風分隔其間由此為故事又朱寵為太尉朝廷賜錦被梁肉雲母屏風



升殿賜坐

宋天禧元年王旦加太尉入謝便座上以其羸瘠拜起頗難命謁者扶掖升殿賜坐勞問又遣其子大理評事雍貴官告賜之加襲衣金帶鞍勒馬如宰臣例

古今文集

雜著

段太尉逸事狀

柳宗元

太尉始為涇州刺史時汾陽王以副元帥居蒲王子晞

為尚書領行營節度使寓軍邠州縱士卒無賴吏不得  
問曰羣行丐取於市不噍輒奮擊折人手足推釜鬲瓮  
盎盈道上把臂徐去至撞殺孕婦人邠寧節度使白孝  
德不敢言太尉自州以狀白府願計事至則曰天子以  
生人分公理公見人被暴害固恬然且大亂若何孝德  
曰願奉教太尉曰某為涇州甚適少事今不忍人無寇  
暴死以亂天子邊事公誠以都虞候命某者能為公已  
亂使公之人不得害孝德曰幸甚如太尉請既署一月

晞軍士十七人入市取酒又刃刺酒翁壞釀器酒流溝  
中太尉列卒取十七人皆斷頭注槊上植市門外晞一  
營大譟盡甲孝德震恐召太尉曰將奈何太尉曰無傷  
也請辭於軍孝德使數十人從太尉太尉盡辭去解佩  
刀選老嫗一人持馬至晞門下甲者出大尉笑且入曰  
殺一老卒何甲也吾戴吾頭來矣甲者愕因諭曰尚書  
固負若屬耶副元帥固負若屬耶奈何欲以亂敗郭氏  
為曰尚書出聽我言晞出見太尉太尉曰副元帥勲塞

天地當務始終今尚書恣卒為暴暴且亂亂天子邊欲誰歸罪罪且及副元帥今邠人惡子弟以貨竄名軍籍中殺害人如是不止幾日必大亂大亂由尚書出人皆曰尚書倚副元帥不戢士然則郭氏功名其與存者幾何言未畢晞再拜曰公幸教晞以道恩甚大願奉軍以從顧叱左右皆解甲散還隊伍中敢譁者死太尉曰吾未哺食請假設草具既食曰吾疾作願留宿門下命持馬者去旦日來還臥軍中晞不解衣戒候卒擊柝衛大

尉旦俱至孝德所謝不能請改過邠州由是無禍

上韓太尉書

蘇轍

太尉執事轍生好為文思之至深以為文者氣之所形  
然文不可以學而能氣可以養而致孟子曰我善養吾  
浩然之氣今觀其文章寬厚宏博充乎天地之間稱其  
氣之小大太史公行天下周覽名山大川與燕趙間豪  
俊交遊故其文踈蕩頗有奇氣此二子者豈嘗執筆學  
為如此之文哉其氣充乎其中而溢乎其貌動乎其言

而見乎其文而不自知也轍生十有九年矣其居家所  
與遊者不過其鄰里鄉黨之人所見不過數百里之間  
無高山大野可登覽以自廣百氏之書雖無所不讀然  
皆古人之陳迹不足以激發其志氣恐遂汨沒故決然  
捨去求天下奇聞壯觀以知天下之廣大過秦漢之故  
都恣觀終南嵩華之高北顧黃河之奔流慨然想見古  
之豪傑至京師仰觀天子宮闕之壯與倉廩府庫城池  
苑囿之富且大也而後知天下之巨麗見翰林歐陽公

聽其議論之宏辨觀其容貌之秀偉與其門人賢士大夫遊而後知天下之文章聚乎此也太尉以才畧冠天下天下之所恃以無憂四夷之所憚以不敢發入則周公召公出則方叔召虎而轍也未之見焉且夫人之學也不志其大雖多而何為轍之來也於山見終南嵩華之高於水見黃河之大且深於人見歐陽公而猶以為未見太尉也故願得觀賢人之光耀聞一言以自壯然後可以盡天下之大觀而無憾者矣轍年少未能通習

吏事嚮之來非有取於升斗之祿偶然得之非其所樂然幸得賜歸待選使得優游數年之間將歸益治其文且學為政太尉苟以為可教而辱教之又幸矣

賀文太尉啓

蘇軾

伏審孚號揚庭臨軒遣使出節少府授鉞齋壇夷夏聳觀兵民交慶蓋功業盛大則極名器而後稱惟德度宏達故處富貴而若無蔚為三世之宗臣豈獨一時之盛事恭惟留守太尉道奉天合德為人師信及三川之豚



魚威加兩河之草木身任休戚言為重輕始若留侯弱  
冠而遇高祖晚同尚父黃髮而亮武王既奉冊書益新  
民聽方將威懷北道係頸長纓約束河公軌流故道然  
後入調伊傅之鼎歸躡松喬之游輿論所期斯言可必  
軾謫官有限趨侍無緣踴躍之心宣寫難盡

排律

上劉侍中

楊巨源

命代生申甫承家翊禹湯廟謨膺間氣師律動清霜鍾

鼎勲庸大山河誠誓長道叶陶鈞力思迴日月光一言  
宏社稷九命備珪璋朱門重榮戟丹詔半纁緇射鵬天  
更碧吹角塞仍黃功垂貞石遠名映色絲香斷磧瞻貌  
虎臨池識鳳皇珠影含空徹瓊枝映座芳軍容雄朔漠  
公望冠巖廊

律詩

御製段太尉碑詩

多難全高節時清終相君園塋標古篆雨露降天文

上羅鄴王

羅隱

營室東迴蔭赤丘少年承襲擁青油坐調金鼎尊明主  
橫把琯弓傲列侯

司徒

歷代沿革少昊氏以鳥名官而祝鳩氏為司徒堯時舜  
為司徒舜攝帝位命契為司徒契玄孫曰微亦為夏  
司徒周地官司徒掌邦教秦為丞相官漢西京初不  
置哀帝元壽二年罷丞相置大司徒以孔光為之光

武二十七年去大字自漢歷魏置為三公及晉迄江  
左其官相承不替宋有丞相又置司徒齊以丞相為  
贈官而司徒品秩冠服同丞相郊廟服冕同太尉梁  
又兩置陳氏以丞相為贈官後魏正光之後復兩置  
北齊廢丞相乾明中又兩置後周並廢丞相置司徒  
宋因之

羣書要語帝曰契百姓不親五品不遜汝作司徒敬敷

五教在寬

書舜典

司徒掌邦教敷五典擾萬民

周官

司徒脩

六禮以節民性明七教以興民德齊八政以防淫一道

德以同俗養耆老以致孝恤孤獨以逮不足尚賢以崇

德簡不肖以黜惡

記王制

司徒巡行縣鄙命農勉作

月大令

司徒之職掌建邦之土地之圖與其人民之數以佐王

安擾邦國以天下之圖周知九州之地域廣輪之數辨

其山林川澤丘陵墳衍原隰之名物

禮地官

凡建邦國以

土圭正其地而制其域

同上

以五禮防萬民之偽而教之

中以六樂防萬民之情而教之和

同上

以保息六養萬民

同矧惟若疇圻父薄違農父若保宏父定辟注農父司

徒也

書酒誥

和五教理人倫使風行俗平萬國咸寧者謂

之司徒

古今通語

詩句緇衣之宜兮敝予又改為兮適子之館兮還予授

子之粢兮

詩鄭風

司徒清鑒懸明鏡

杜洗兵馬

古今事實

丞相之職

晉何曾以太保侍中領司徒曾固讓詔曰司徒舊丞相

之職自古及今總論人物化治之本以君宏道故選於衆而復盤桓非所聞也

### 五教之官

晉石苞拜大司馬策免以公歸第詔以苞為司徒雖以過防受黜尋授五教之官深陳農桑本務明其考課居五年天下稱之

### 聖人在政

魯侯欲以孔子為司徒將召三桓議之乃謂左丘明左

丘明曰孔丘其聖人歟夫聖人在政過者離位焉君雖欲謀其將弗合乎魯侯曰吾子奚以知之丘明曰周人有愛裘而好珍羞欲為千金之裘而與狐謀其皮欲具少牢之珍而與羊謀其羞言未卒狐相與逃於重丘之下羊相呼藏於深林之中故周人五年不制一裘十年不足一牢何者周人之謀失矣今君欲以孔丘為司徒召三桓而議之亦與狐謀裘與羊謀羞哉於是魯侯遂不與三桓謀而召孔丘為司徒



父子善職

鄭武公父子並為司徒善於其職國人宜之

鄭風緇衣詩

股肱心膂

穆王命君牙為周大司徒王若曰嗚呼君牙惟乃祖乃父服勞王家厥有成績紀於太常今命爾予翼作股肱心膂績乃舊服毋忝祖考

謀謨帷幄

漢光武即位於鄱使使持節拜鄧禹為大司徒策曰前

將軍禹深執忠孝與朕謀謨帷幄決勝千里今遣奉車  
都尉授印綬封為鄼侯邑萬戶敬之哉禹時年二十四

明察守正

侯霸字君房為大司徒封關內侯任位明察守正奉公  
不回

恭約盡忠

馮勤字偉伯遷司徒先是三公多見罪退帝賢勤欲令  
以善自終乃因宴見從容戒之曰朱浮上不忠於君下

陵轢同列竟以中傷至今死生吉凶未可知豈不惜哉  
人臣放逐受誅雖復追加賞賜賻祭不足以償不貲之  
身忠臣孝子覽照前世以為鑒誠盡忠於國事君無二  
則爵賞光於當世功名列於不朽可不勉哉勤愈恭約  
盡忠號稱職任

憂念王室

袁安為司徒每朝會憂念王室未嘗不流涕

奏課農桑

石苞為司徒奏州郡農桑未有賞罰之制宜遣掾屬循行皆當均其土宜舉其殿最然後黜陟

自執牙籌

晉王戎拜司徒雖位總台司而委事僚寮間乘小馬從便門而出遊見者不知其三公也故吏多至大官道路相遇輒避之性好興利廣收八方園田水碓周徧天下積貫聚錢不知紀極每自執牙籌晝夜筭計宿若不足而又儉嗇不自奉養天下人謂之膏肓之疾

吏皆皂服

王渾遷司徒仍加兵渾以司徒文官主吏不持兵及吏屬絳衣自以非是舊典皆令皂服論者美其識體

清貧蔬食

華歆為司徒素清貧文帝出詔曰司徒國之雋老所以和陰陽理庶事今大官重膳而司徒蔬食甚無謂也時賜御衣

臥麤布被

劉寵為司徒臥麤布被

家無儋石

華歆文帝時為司徒素清貧祿賜以振施親戚故家無儋石之儲公卿常並賜没入家口唯歆出而嫁之帝歎息

子無立錐

范遷為司徒有宅數畝田不過一頃復推與其兄子其妻常曰君有四子無立錐之計

逕還章綬

魏舒字陽元為司徒年過致仕有遜讓章而無居宅乃漸以奉秩之餘為第一所舒素為人先行而後言故未嘗語親疎言當遜位元年正月整法服入殿朝會罷逕還奉送章綬內外莫有知舒此情者

不汚官府

山濤為司徒固辭已勅斷章表乃卧加章綬濤曰垂沒之人豈可汚官府乎輿疾歸家

板輿上殿

晉司徒傅祗疾遜位不許板輿上殿

劔履上殿

晉何曾以太傅領司徒屢遜位詔以司徒所掌煩務不可以久勞者艾其進位大朝會乘輿劔履上殿如漢蕭何魏鍾繇故事

詔頒天下

宋宰相呂夷簡詔特守司徒依前兼門下侍郎同中書



門下平章事三表懇讓不敢當乃降詔上令錄其詔書  
頒于天下使四海之人知朝廷有退讓之臣

夢禾得秩

蔡茂字子禮為司徒在職清儉匪懈茂初在廣漢夢坐  
大殿極上有三穗禾挑取之得其中穗輒復失之以問  
主簿郭賀賀離席慶曰夫殿者官府之形象也極而有  
禾人臣之上祿也取中穗中台之位於字禾失為秩雖  
曰失之乃所以得祿秩也衮職有闕公其補之旬月而

茂徵馬

見虹策免

郎顗上章曰竊見今月十四日乙卯時白虹貫日見日旁氣色白而純者名曰虹貫日中者侵太陽也見於日旁政變常也易傳曰公能其事序賢進士後必有喜反之則白虹貫日以甲乙見則譴在中台自司徒居位陰陽多謬宜黜司徒以應天意注韓詩外傳曰三公者司空司徒司馬也司馬主天司空主地司徒主人故陰陽

不調星辰失度責之司馬山林崩絕川谷不流責之司空五穀不殖草木不茂責之司徒甲乙東方主春生殖五穀之時也而白虹以甲乙日見明責在司徒也時劉崎為司徒至陽熹三年策免

銅臭三公

崔烈歷位郡守九卿靈帝時開鴻都門榜賣官爵公卿州郡下至黃綬各有差烈入錢五百萬得為司徒于是聲譽衰減問其子鈞曰吾居三公於議者何如鈞曰大

人少有英稱歷位卿守論者不謂不當為三公而今登其位天下失望烈曰何為然也釣曰論者嫌其銅臭

落水三公

宋謝超宗為人恃才使氣多陵忽司徒褚彥回因送湖州刺史王僧虔閣道壞墜水僕射王儉驚跳下車超宗撫掌笑曰落水三公墮車僕射彥回出水沾濕狼籍超宗先在僧虔舫聲曰有天道焉有地道焉天所不容地所不受投畀河伯河伯不受彥回大怒曰寒士不遜超

宗曰我不賣袁劉得富貴焉能免寒士乎

古今文集

律詩

故司徒李公光弼

杜甫

司徒天寶末北收晉陽甲胡騎攻吾城  
愁寂意不愜人安若泰山薊北斷  
右脅朔方氣乃蘇黎首見帝業二宮  
泣西郊九廟起頽壓末散河陽卒  
思明偽臣妾復自碣石來火焚乾坤  
獵高視笑祿山公又大獻捷異王冊  
崇

勲小敵信所怯擁兵鎮河汴千里初安帖青蠅紛營營  
風雨秋一葉內省未入朝死淚終映曉大屋去高棟長  
城掃遺堞平生白羽扇零落蛟龍匣雅望與英姿惻愴  
槐里接三軍晦光彩烈士痛稠疊直筆在史臣將來洗  
箱篋吾思哭孤冢南紀阻歸楫扶顛永蕭條未濟失利  
涉疲薶竟何人灑涕巴東峽

司空

歷代沿革司空古官少吳氏以烏紀官爽鳩氏司空也

舜攝位以禹為司空契之子曰冥為夏司空商湯時  
咎單為司空周時司空為冬官掌邦事成王以毛公  
為司空春秋時宋以武公之諱改司空為司城楚改  
司空為莫敖秦置御史大夫省司空漢西京初不置  
成帝綏和元年更名御史大夫為大司空哀帝建平  
二年復為御史大夫元壽二年復為大司空光武二  
十七年去大字獻帝建安十三年又罷司空置御史  
大夫魏省御史大夫置司空景初二年以司隸校尉

崔林為司空晉以荀顗為之歷宋齊梁陳後魏北齊  
皆省御史大夫置司空後周二職並廢隋氏諱忠以  
御史中丞為大夫故又置司空唐司空一人宋仍之  
羣書要語舜曰咨四岳有能奮庸熙帝之載僉曰伯禹  
作司空帝曰咨禹汝平水土惟時懋哉書舜典司空掌

邦土居四民時地利

周官

司空執度地居民山川沮

澤時四時量地遠近興事任力

記王制

危東六星兩兩

而比曰司空

春秋元命苞

度量不審舉事失理都鄙不脩



財物失所則飭司空

家語

凡營城起邑浚溝洫脩墳坊

之事則議其利建其功凡四方水土功課歲盡則奏

其殿最而行賞罰凡郊祀之事掌掃除樂器大喪則

掌將校復土凡國有大造大疑諫諍與太尉同

後漢百官

志今注

下理坤道上和乾元為司空

漢官解詁

司空主土不

言土而言空空尚主之況於實乎

白虎通

使國無枉理

法錯刑清事均民聚者謂之司空

古今通語

詩句司空見慣渾閒事惱斷蘇州刺史腸

杜牧

古今事實

物得其所

魯定公以孔子為司空乃別五土之性而物其所生之

宜咸得厥所

家語

經為儒宗

漢師丹為大司空策免唐林上疏曰丹經為世儒宗德為國黃耆海內未見其大過免爵太重京師識者咸以為宜復爵邑使奉朝請

內亞三鼎

齊孔稚圭為王敬則讓司空表曰故李通豪膽以親寵  
登用王基才勇以聲華入選先帝擢臣以榮華陛下申  
臣以富貴遂得北帶五州東跨六郡內亞三鼎外齊四  
岳蟬佩之映則左右交輝龜組之華則縱橫吐耀輕輪  
徐動則劍騎如雲飛蓋暫停則歌鍾成列縱金龍吹鬱  
其前鳴笳鳳管疊其後鄧禹若不遭漢光則南陽之掾  
史微臣若不逢明主則孤城之戍客豈可加以正台之

席登以論道之寄啓黃扉而燮五緯躡青帷而調四序  
職班三事

梁劉孝儀為臨川王解司空表曰臣以庸薄謬竊隆重  
職班三事任總六條衣袞坐槐既闕論道馳傳憩棠尤  
慙為政而俯司土地仰燮陰陽今水沴乃作旱魃為灾  
乞降茲台步協此天人

才行授官

唐長孫無忌策拜司空固辭不許又因高士廉奏曰臣

幸居外戚恐招聖主私親之誚敢以死請太宗曰朕之授官必擇才行若才行不至縱朕至親亦不虛授襄邑王神符是也若才行所適雖怨讎不棄魏徵等是也朕若以無忌居后兄之愛當多遺子女金帛何須委以重官蓋是取其才行爾

忠勤具望

晉荀蕃為司空劉琨奏曰司空荀蕃朝廷之舊官繼世忠勤乃心王家具瞻之望唯蕃而已宜增位號授分陝

之重

在功臣右

漢竇融拜冀州牧十餘日遷大司空融自以非舊臣一  
旦入朝在功臣之右召會進見容貌辭氣卑恭已甚帝  
以此愈親厚之

得大臣節

漢牟融經明才高善論議顯宗數嗟歎以為才堪宰相  
明年代伏恭為司空舉動方重甚得大臣節

儒雅有畧

晉張華彊記默識四海之內可指諸掌拜司空儒雅有  
籌畧盡忠匡輔雖闇主虐后之朝而海內晏然華之功  
也

儒者為榮

漢伏恭為太僕帝臨辟雍於行禮中拜恭為司空儒者  
以為榮

斷斷守善

漢謝弼上封事曰今之四公惟司空劉寵斷斷守善餘皆素餐

不為苛碎

後魏伊馥拜司空及為三公清約自守為政舉大綱而已不為苛碎

不修威儀

漢第五倫為司空奉公盡節言事無依違諸子或時諫止輒叱遣之吏人奏記及便宜者亦併封上其無私如



此性質少文采在位以清白稱時人方之貢禹然少醞藉不修威儀亦以此見輕

不求名譽

漢任隗拜司空義行內修不求名譽以沉正見重於世

削封事藁

漢陳羣司空前後數密陳得失每上封事輒削其草時人及其子弟莫能知也論者或譏羣居位拱默羣薨正始中詔選羣臣上書以為名臣奏議朝士乃見羣諫事

皆歎息焉

上諫獵疏

王朗為司空文帝頗出遊獵或昏夜還宮朗上疏諫帝  
報曰覽表雖魏絳稱虞箴以諷晉悼相如陳猛獸以戒  
漢武未足以喻方今二寇未殄將帥遠征故時入原野  
以習戎備至於夜還之戒已詔有司施行

掃第以待

趙瑤自扶風太守來之郡司空張溫謂曰第五伯魚從

蜀郡為司空今掃吾第以待足下

去籍通客

陳寵為司空府故事以吏至時自公以下督屬籍不通  
賓客以防交關寵去籍通客以明無所不受論者大之  
家無貲產

宋弘為大司空所得租俸分贍九族家無貲產以清行  
致稱

不營產業

晉司空王基著德立勲治身清素不營產業身沒行顯  
足用勵俗詔以奴婢二人賜其家

員郎更直

唐裴寂策司空遣尚書員外郎一人每日更直寂第其  
見崇貴如此太宗祀南郊命寂與長孫無忌同昇金輅  
寂固辭讓太宗曰以公有佐命之勲無忌亦宣力於朕  
同載參乘非公而誰遂同乘而歸

金輅同昇

見前

白衣三公

漢荀爽董卓政徵之起巖穴九十五日而為司空時號為白衣登三公

列侯三公

魏司空關孟康奏竊見司隸校尉崔林稟自然之正性體高雅之宏量論其所長以比古人忠直不回則史魚之儔清論守約則季文之匹遂為司空封安陽亭侯三公封列侯自林始也

便令掃除

五代馮道入朝拜司空唐制三公為加官無單拜者或云三公正宰相便合參大政又云合策授又云祭祀時便令掃除道聞之曰司空掃職也吾無所憚既而知非乃止

願上印綬

漢彭宣自御史大夫轉為司空會王莽為大司馬秉政專權宣上書言年齒老鈍數伏疾願上大司空長平侯

印綬乞骸骨歸鄉里

立學士班

宋天禧四年以資政大學士太保致仕王欽若為司空  
職如故時欽若求侍東宮講誦以輔臣兼領三少品序  
非便表求換秩乃有是命止立學士班

非賞勞臣

宋熙寧二年宰臣曾公亮司徒兼侍中韓琦提舉兩朝  
實錄乞不令推恩上以為有例而公亮奏臣當遷司空

琦太保三公非賞勞之臣從之

古今文集

雜著

除文彥博守司空依前樞密使加食邑實封制

王珪

朕若稽先王維御羣品左謀金鉉之老以經治於廟堂  
右屬鴻樞之良以定策於帷幄厥有成績可勿褒乎具  
官某風力肅明器資恢傑臨至劇有轉圜之易定大謀



如執玉之堅遠事神文之朝已緝熙於鼎路追言聖考  
之遇又密勿於機廷肆涼昧之丕承會精神於羣慮雖  
兵民之異本亦文武之交脩未隆贊冊之恩曷懋圖庸  
之舉其保宏父允釐華陽顧豈名位之私終繫老成之  
助於戲有若閔天尚迪文王之彝罔俾阿衡以專商家  
之美往篤爾烈永承于休

除呂公著守司空同平章事制 蘇軾

仁莫大於求舊智莫嚴於用衆既得天下之大老彼將

安歸以至國人皆曰賢夫然後用今朕一舉仁智在焉  
宜告治朝以孚大號具官某訐謨經遠精識造微非堯  
舜不談昔聞其語以社稷為悅今見其心三年有成百  
揆時叙維乃烈考相予昭陵蓋清淨以寧民亦勞謙而  
得士凡我儀刑之老多其賓客之餘在武丁時雖莫追  
於前烈作召公考固無易於象賢而乃屢實封章力求  
退避朕重失此三益之友而閔勞以萬機之煩是用遣  
平土之司釋文昌之任毋廢議論時遊明堂於戲大事

雖咨于房喬非如晦莫能果斷重德無逾於郭令而裴  
度亦寄安危罔俾斯人專美唐世

除司空呂公著上表辭免不允批荅

蘇軾

夫國以得人為彊如猛獸之衛藜藿以積賢為寶如珠  
玉之茂山川湛然無為物自蒙利故崔公發議則淄青  
慙服知朝廷之有人蜀使抗詞則孫權回顧歎張昭之  
不在得失之效豈可同日而語哉朕之用卿意實在此

國計之重可無復辭

律詩

挽宋司空

歐陽修

文章天下無雙譽伯仲人間第一流出入兩朝推舊德  
周旋三事著嘉謀從容進退聲名泰寵錫哀榮禮數優  
棠棣從來敦友愛九原相望接松楸

開府儀同三司

歷代沿革漢文帝元年用宋昌為衛將軍位亞三司章

帝建初三年使車騎將軍馬防班同三司三司之名  
始此殤帝延平元年鄧騭為車騎將軍儀同三司儀  
同之名始此魏黃權以車騎將軍開府儀同三司開  
府之名始此晉羊祜為車騎將軍開府如三司之儀  
自是以後又有如開府同三司之儀者自祜始焉宋  
太宰以下至光祿大夫開府者為文公大司馬以下  
至諸將軍開府者為武公梁置位次三公從一品隋  
開皇中以為四品散官煬帝改為從一品同漢魏之

制位次王公唐武德改為輕車都尉後以開封儀同  
三司為文散官雖三公三師亦必冠以此號宋因唐  
節度使兼平章事號使相元豐定官制既罷同平章  
事遂以節制開府為使相而文武寄祿官亦存之元  
開府儀同三司從一品

羣書要語階極儀台

權相嚴  
震墓誌

聖王納制九命俾尊於開

府

唐大  
詔令

開府崇階視儀上宰

曲阜行燕達  
贈使相制

班同衮章

齊王

儉拜儀同  
三司章

位次王公

隋

宜進秩於八命儀亞槐庭

常衮  
制

班同三事

東觀記

位逾九卿班同三府

袁宏漢紀

禮隆八命秩

比三台

常衮加杜冕儀同制

秩視三公

南窓記

神夢紫霄心飛丹掖

品同儀比視鉉莫殊

王僧孺代表

心馳紫路登文石而莫由

目送白雲拜承明而未果

江總謝儀同三司表

開府之榮名重矣

矧優其禮命視於文品為第一

南豐擬制

臣宅慶紫霄聯休

皇極地均棲月既無迹以成高仕若乘風故不行而自

遠論其才望有愧茂宏先佩印綬常羞叔度

梁庾肩吾武陵王拜

儀同章

詩句清新庾開府

杜

開府當朝傑

杜

古今事實

歷勲文武

晉泰始八年詔曰衛將軍羊祜歷文武有佐命之勲其  
為車騎將軍開府如三司之儀

著信蠻夷

隋何稠為散騎常侍安集嶺南欽州刺史宥猛方欲為  
逆至是請身入朝稠與之約詣京師後猛入朝上大悅



曰何稠著信蠻夷乃至於此以勲授開府

國史補

閒居俸給

開元以前舊例開府特進雖不帶事皆給俸祿與朝會皆崇官盛德罷劇就閒者居之

不以名稱

宋璟不以名稱止曰宋開府

班同衮章

王儉拜儀同三司班同衮章

位登衮職

徐孝嗣加儀同三司孝嗣聞詔斂容謂左右曰吾德慙古人位登衮職將何以堪之固辭不受

齊書

寵賜帳褥

晉太始七年以鄭袤為司空稱疾上送印綬至于十數久之見許以侯就第拜儀同三司置舍人官騎賜沐帳簟褥錢五十萬

詔賜几杖

蔡謨免皇太后詔以謨為左光祿大夫儀同三司遣謁  
者孟洪就加冊命謨上疏陳謝遂以疾篤不朝詔賜几  
杖門施行馬

令乘輅服

李賢遷開府儀同三司太祖西巡至原州幸賢弟讓齒  
而坐行鄉飲酒禮其後又至原州令賢乘輅備服儀以  
諸侯會遇禮相見然後幸賢第歡宴終日凡是親族頒  
賜有差

夢升台鉉

陳章昭達字伯通寶應初授鎮前將軍開府儀同三司  
初文帝夢昭達升台鉉及旦告之至是侍宴酒酣顧昭  
達曰卿憶夢否卿何以償對曰臣當效犬馬之勞以盡

臣節自餘無以奉償

陳書

疇其勲績

元康詔中書監光祿大夫張華歷世腹心情所馮賴故  
疇其勲績使儀同三司而虛冲挹損難違高志其以光

祿大夫儀同三司本職如故

不登台司

華廙為太子少傅甚得輔導之義河南尹韓壽賈后之妹夫欲以女配廙孫陶廙拒不許深以為恨故不登台司疾篤乃進位光祿大夫儀同三司

開府千餘

北齊後王驕縱無度諸濫得富貴者將數萬人庶姓封王者百數開府千餘儀同無數馬及鷹犬乃有儀同之

號閭雞亦號開府

執笏百餘

隋高祖受禪李穆來朝高祖降坐禮之拜太師子孫雖襁褓必拜儀同其一門執笏百有餘人

古今文集

雜著

除皇弟似守太保充保平鎮安等軍節度使依

前開府儀同三司蔡王制  
曾肇

朕惟奉朝之制厚公族之恩列第京師不忍使之去國  
兼榮將相未嘗責以治民豈惟致敦敘之仁抑亦隆夾  
輔之勢矧吾寵弟實位真王念方屬於妙齡將即安於  
外邸雖云密邇能不疚懷肆舉徽章用孚羣聽具官出  
神明之胄鍾禔祝之祥氣稟溫良生知遜悌推受圖書  
之習夙堅忠孝之誠桐葉疏封已侈盤維之寄棣華致  
好每敦和樂之私比遵朝著之趨尚處宮隅之邃屢觀  
啓奏祈避禁嚴志雖莫回情實未忍思在宗之誼宜忘

原隰之哀顧開府以時難廢國家之典廼蠲穀旦增峻  
官儀更兩鎮之節旌正三師之位叙蕪陪并賦益壯宗  
藩於戲周誥孟侯則曰無康好逸漢詔諸子亦云無適  
宵人蓋位不期驕者人情之常寵至益戒者前哲所尚  
徃服休命永綏令名

排律

投贈哥舒開府翰二十韻 杜甫

今代麒麟閣何人第一功君王自神武駕馭必英雄開



府當朝傑論兵邁古風先鋒百勝在畧地兩隅空青海  
無傳箭天山早掛弓廉頗仍走敵魏絳已和我每惜河  
湟棄新兼節制通智謀垂睿想出入冠諸公日月低秦  
樹乾坤繞漢宮胡人相逐北宛馬又從東受命邊沙遠  
歸來御席空軒墀曾寵鶴畋獵舊飛熊茅土加名數山  
河誓始終策行遺戰伐契合動昭融勲業青冥上交情  
氣槩中未為珠履客已見白頭翁壯節初題柱生涯獨  
轉蓬幾年春草歇今日暮途窮軍事留孫楚行間識呂

蒙防身一長劍將欲倚崆峒

律詩

上開府

范純仁

三紀中書更有誰致君堯舜以臯夔頻年力請方歸第  
天子臨軒冊太師

特進

歷代沿革漢制諸侯功德優盛朝廷所敬異者賜位特  
進位在三公下故曰特進自宣帝用太子外祖許廣

漢為平恩侯位特進而特進之名始見於此其後或

領城門兵得舉吏如五府

王商

或見禮如丞相得置從

事史

張禹

或給事中視尚書事

薛宣

或奉朝請傅喜或議大

政

張禹

其職不一後漢皇后兄弟率為特進侯二漢及

魏晉以為加官元康中惠帝定令特進位次諸公在

開府驃騎上齊時位從公陳因之後魏北齊用人皆

以舊德隋文帝以為散官不治事煬帝廢唐為文散

官雖不帶職事皆給俸祿得預朝會班列依本品之

次皆崇官盛德罷劇就閒者居之宋元豐新制改尚

書左右僕射為特進居文階之首大觀著令非宰臣

不除

大觀三年修成中書敕令格式四十卷諸非宰臣不除特進政和間薛昂以觀文殿學士白時

中以門下侍郎並帶特進繼改金紫光祿大夫今後非宰臣不得除官制舊典除改非宰相不除特進大觀已有此法非起于政和也元開府儀同三司之下有特進

羣書要語特進以加文武之德齊者

隋百官志

二品崇階

謝國

第制

諸侯勲德之盛則就加特進以寵之

李光顯除特進制

位次

三公居驃騎儀同之上非茂勲俊德曷以處之

李德裕集神策

劉公神道

朝位特見

劉阮特進制

特進崇班自共冠諸侯之上

馮延

制已

大見信用

巍巍特進仍踐其位赫赫三事躬佩其

華

古今事實

位次三公

後漢樊宏位特進次三公

榮亞三公

李德裕謝加特進狀漢制進以文冕列侍清祠榮亞三

公品居第二自非學深張禹功重竇融則何以膺是寵章

尊為國師

謝承後漢書云趙典尊為國師位特進寢則布被尾器而食

為天子師

張禹雖居家以特進為天子師國家每有大政必與定

議

漢書

進達名士

曹勝加位特進其所進達皆海內名士

極言進諫

陰識拜執金吾位特進入則極言正諫至與賓客語不及國事慕仲山甫匪躬之節所用掾吏皆天下俊哲司馬

彪後漢書

特見優禮

後魏刁雍拜特進以年高特見優禮

特賜安車

後漢梁適位特進賜安車駟馬

古今文集

律詩

賜特進汝陽王

杜甫

特進羣公表天人夙德升霜蹄千里駿風翻九霄鵬學  
業醇儒富辭華哲匠能筆飛鸞鶴立章罷鳳騫騰

古今事文類聚新集卷三



欽定四庫全書

古今事文類集新集卷四

元 富大用 撰

省官部

尚書省

歷代沿革尚書省猶唐虞大麓之職也書納於大麓王  
肅注云堯納舜於尊顯之官大錄萬機之政周官司  
書鄭玄云若今尚書秦時少府遣吏四人在殿中主

發書故謂之尚書尚猶主也有尚書令尚書僕射尚書丞至漢武帝時左右曹諸史分平尚書奏事知樞密者始領尚書事昭帝時霍光以大將軍領尚書事成帝初王鳳以大司馬師丹以左將軍並領尚書事後漢章帝以太傅趙憙太尉牟融並錄尚書事尚書有錄名自憙始和帝時太尉鄧彪為太傅錄尚書事位上公在三公上漢制遂以為常每少帝立則置太傅錄尚書事猶古冢宰總已之義薨輒罷之漢初尚

書雖有曹名不以為號及靈帝以侍中梁鵠為選部於是始有曹名總謂之尚書臺亦謂之中臺大事八座連名而有不合得建異議二漢皆屬少府魏晉以後亦公卿權重者為之自置中書省有監令掌儀衡之任而尚書之權漸減矣宋曰尚書寺居建禮門內亦曰尚書省亦謂之內臺事梁陳舉國機要悉在中書獻納之任又歸門下而尚書但聽命受事而已後魏天興元年置八部大夫於皇城四方四維以擬八

座謂之八國各有屬官分尚書三十六曹及諸外置  
令大夫主之四年又復尚書三十六曹天賜元年後  
罷別置武歸脩勤二職分主省務神麤元年始置僕  
射左右丞及諸曹尚書十餘人各居別室北齊尚書  
省亦有錄令僕射總理六尚書事謂之都省亦謂之  
北省後齊七王以太子監國立大都督府與尚書省  
分理衆事仍開府置佐後周無尚書隋高祖時尚書  
省事無不總置令左太僕射各一人總吏部禮部兵

部都官度支工部等六曹事是為八座屬官左右丞  
各一人都事八人分司管轄唐制畧同尚書省都堂  
居中左右分司堂東有吏戶禮三行每行四司左司  
統之西有兵刑工三行每行四司右司統之凡二十  
四司分曹共理而天下之事盡矣龍朔二年改尚書  
省為中臺咸亨初復舊光宅元年改為文昌臺垂拱  
元年又改為都臺咸通初復舊長安三年又改為中  
臺神龍初復為尚書省亦謂之南省宋朝尚書省掌

六曹諸司文書施行制命舉省內紀綱程式正御史糾不當者聽內外枉屈辨訴凡六曹不能決者總而決之元參用古制建尚書省總領紀綱儀刑端禁置尚書令左右丞相及平章政事二人任宰相之職掌丞天子平章萬機其屬有左丞右丞及參知政事二人執政之官為宰相之貳佐治省事又有左司掌總察吏戶禮三部受事付事右司掌總察兵刑工三部受事付事二司各有郎中員外郎都事等員在外

別置行省

羣書要語輔位明堂遺象麟閣

齊謝朓表

尚書職居天官政

化之本

南齊詔

尚書百官之本國家樞機

六典

尚書萬事之

本王化所由宜參貳親賢以康庶政

晉穆帝詔

天下樞要在

於尚書

韋彪傳

文昌天府

晉百官表注

堯試舜於大麓者領錄

天下事如今之尚書宜得大賢乃可使處議持平焉

桓譚

新論陛下之有尚書猶天之有北斗也斗為天喉舌尚書

為陛下喉舌斗斟酌元氣運平四時尚書出納王命賦

政四海

東漢李固疏

詩句尚書北斗尊

顏真卿集

聽履星辰北斗寒三能只隔片

雲間周家冢宰均四海漢制尚書本百官

楊誠齋詩

古今事實

都堂居中

唐制尚書省都堂居中左右分司堂東西凡二十四司

分曹共理

詳見前  
沿革

制勅用黃



唐高宗時勅曰制勅施行既為永式比用白紙各有蟲蠹自今尚書省頒下諸州縣並用黃紙

百官總已

太尉鄧彪元勲之族三讓彌高海內歸仁為羣賢首聰明康強可謂老成人矣其以彪為太傅錄尚書事百官

總已以聽

漢和帝策書

三公絕席

張禹拜太傅錄尚書鄧太后以殤帝幼育欲令重臣居

禁內乃詔禹舍宮中給帷帳牀褥大官朝夕進食五日  
一歸府每朝贊與三公絕席

謹慎周密

前漢張安世拜大司馬車騎將軍領尚書事職典樞機  
以謹慎周密自著外內無間嘗有所薦其人來謝安世  
以為舉賢建能豈有私謝邪絕弗復通有郎功高不調  
自言安世應曰君之功高明主所知人臣執事何長短  
而自言乎絕不許已而郎果遷又幕府長史遷辭去之

官安世問以過失長史曰將軍為明主股肱而士無所  
進論者以為譏安世曰明主在上賢不肖較然臣下自  
脩而已何知士而薦之其匿名迹遠權勢如此

本傳

### 中正弘遠

晉元康元年詔司徒王渾秉德中正識量弘遠歷位內  
外文武勲庸著在方策宜參弼機衡以亮天工其令錄

尚書事

晉書

### 三人參錄

太尉趙峻二世掌典機衡有匪石不貳之心大司農李固公侯之苗忠直不回有史魚之風今以峻為太傅固為太尉與大將軍冀參錄尚書事

東西二錄

晉宗室會稽王道子進位丞相錄尚書假節都督中外諸軍事勢傾天下道子世子元顯又加錄尚書事道子政無大小一委元顯時謂道子為東錄元顯為西錄

典職六年

章帝詔曰司空牟融典職六年勤勞不怠其以牟融為  
太尉錄尚書事

典樞十年

孔光領尚書事凡典樞機十餘年守法度脩政事不希  
旨苟合

志誅曹節

竇后臨朝以陳蕃為太傅錄尚書事蕃與后父大將軍  
竇武同心盡力徵用名賢共參政事志誅常侍曹節等

以其諂事太后多行貪虐天下之士莫不延頸想望太平及事漏曹節矯詔誅武等蕃遂見害

恥為魏臣

魏楊彪為太尉錄尚書事及李淮郭汜之亂彪盡節為主崎嶇危難之間幾不免於害見漢符命將終自以累世為三公恥為魏臣遂稱足疾不復行積十餘年魏文帝即王位欲以為太尉令近臣宣旨彪辭曰嘗以漢朝為三公值危亂不能立尺寸之益若復為魏臣於國之

選亦不為榮也帝不奪其意

劔履上殿

汝南文成王亮為太宰錄尚書事入朝不趨劔履上殿  
增掾屬十人與太保衛瓘對掌朝政

讚拜不名

晉泰和元年詔會稽王朕承洪緒乃聞善誘慎徽五教  
儀刑具瞻其以昱為丞相錄尚書事入朝不趨讚拜不  
名劔履上殿給羽葆鼓吹班劔六十人

暴風拔木

北海王祥初遷大將軍錄尚書事祥已拜命其夜有暴

風震電拔木倒立識者知其不終

後魏書

天火示災

東晉元興元年舍下火是時指言用事出鎮姑熟名雖

在外實遙錄尚書故天火示不復用也

徽祥記

古今文集

雜著



尚書省謝車駕臨幸表

林希

天臺肇建具崇喉舌之司帝車下臨增重陞簾之寄非常之舉視古無偏恭惟皇帝陛下天縱多能日新盛德剷除衆弊裁制萬微考先王之董治官立尚書以為政本紀綱條理見微旨於新書勅作規模別攸司於著位蓋慮之積年而成於茲日聞諸前世而驗於方今忽紆清蹕之傳采聳鴻都之觀且北辰居極外環象斗之宮而黃道所經旁及積星之位瞻威顏於咫尺被法語之

丁寧勅以在公退而交儆分曹帥屬燦然周典之文望  
輦拜恩陋彼漢郎之嘆矧復宗藩旅進禁從相趨凡獲  
侍於宸遊皆預窺於聖作歡聲載溢慶榮遇於一時信  
史備書流美談於萬世臣等叨膺重任久負明恩顧懷  
備位之慙第劇逢辰之幸敢忘策勵期稱寵臨

尚書令

歷代沿革秦置令丞屬少府漢因之武昭之後其任稍  
重宣帝時任中尚書官元帝時弘恭石顯相繼為中

書令元帝被疾不親政事遂委任焉及蕭望之領尚書事知顯專權建言以為尚書百官之本國家樞機宜以通明公正處之武帝遊宴後庭始用宦者非古

制請罷中尚書

中書與尚書奏事故連言之

及光武親總吏職權

歸尚書三公但受成事而已自魏至晉宋齊秩皆千石品並第三梁加秩中二千石班第十六陳加品至第一後魏北齊及隋品皆第二唐因之太宗初為秦王署尚書令其後人臣莫敢為遂廢其官其國政樞

密皆委中書至代宗以親賢有大勲遂特拜尚書令  
五代梁開平三年詔升尚書令為正一品宋朝因之  
元尚書令一人正一品

羣書要語總百官之得失管王政之開塞者端右之職

也

晉書

國家司總括百揆憲範王猷式是羣辟故必簡德

而拔量才而受

謝石疏

百揆之首總參機衡出納朝政治

績之所由也

晉起居注

寵納大麓七政以齊內成外平風雨

不迷補我袞闕闡我王猷王猷允塞四海咸休雖聖雖明必

賴良才無曰我智官不能任發言如絲其出如綸千里

之應樞機在身

摯虞尚書議

平原帶地資緒極天

王或謝開封尚書令

表

揚職萬機總任百揆權衡庶物準的羣僚可以助日

月之光華增天地之高厚

北齊邢子才謝表

尚書掌出納王命

敷奏萬機令總統之

隋百官志

天府文昌萬方之數天官冢

宰無所不統禮尊三獨事總百揆

江總讓表

昔之冢司今日

端撰

同上

司會治本冢宰朝端搢紳所屬儀刑攸在

同上八

座比於文昌二丞方於管轄苟非稱職竊位興譏

劉自知

北斗為天之喉舌尚書陛下之喉舌

李固疏

八座之學百

揆之首

白帖

古今事實

端撰官

漢光武親總吏職天下事皆上尚書與人主參決乃下  
三府尚書令為端撰之官

三獨坐

後漢尚書令主贊奏事總領紀綱無所不統與司隸校

尉御史中丞朝會皆專席而坐京師號曰三獨坐

能識亡書

前漢張安世以父任為郎天子行幸河東嘗亡書三篋  
詔問莫能知唯安世識之後購求得書以相校無所遺  
失竒其材擢為尚書令

明習故事

漢侯霸字君房光武徵霸與車駕會壽昌拜尚書令時  
無典故朝廷又少舊臣霸明習故事收錄遺文條奏前

世刑政法度有益於時者皆施行之  
漢黃瓊字世英

遷尚書令明習故事號為富贍

直言無撓

漢申屠剛為尚書令謇謇直言無所屈撓

駁議合意

後漢宋約為尚書令忠正直言數納策謀每駁議未嘗

不合上意

本傳

臺閣舊習



漢黃香遷僕射月餘為尚書令增秩二千石上惜其幹  
用臺閣舊習遂見尊重香亦勤力憂公畏慎周密每月  
奏議所建畫未見流布者

宮闕故事

陳忠為尚書令數進忠言辭旨弘麗前後所奏悉條於  
宮闕為故事

言旨切直

任防為尚書令職典樞機竭忠於國數條便宜譏刺時

政以補闕失言旨切直

清儉履道

晉太熙元年詔曰夫總百揆之得失管王政之開塞者  
端右之職也自漢以來每選此官常慎其人議郎王戎  
清儉履道庸勲已著其以戎為尚書令

頭軻輿輪

後漢申屠剛遷尚書令光武嘗欲出遊剛以隴蜀未平  
不宜宴安逸豫諫不見聽遂以頭軻乘輿輪遂止

諫回帝車

陳矯為尚書令明帝幸至尚書門矯問曰陛下欲何之  
帝曰欲案行文書爾矯曰此臣職分非陛下所宜臨若  
不稱職則請就黜帝慙回車

不接賓客

陳蕃為豫章太守性方峻不接賓客徵為尚書令送者  
不出郭門

不阿豪勢

楊惟拜尚書令平心正直選舉高妙進善嫉惡不阿豪勢

皆慎選舉

左雄為尚書令限年四十九先試經然後舉孝廉故雄為令在位者各肅清時稱曰左伯豪為尚書天下皆慎選舉

每擢英俊

衛良拜尚書令每當選舉拔擢天下英俊及二千石長

吏功次者用之

剪邪截曲

劉祐拜尚書令正身機密剪邪截曲不撓狂臣

旌賢退惡

羊陟拜尚書令明審選舉旌賢退惡

治身無嫌

唐約字仲謙拜尚書令自典樞機數有直言美策以補益主上每作表疏皆手自書之處官任職不言貨利之

事當公執法不阿所私京師號曰治身無嫌唐仲謙

厥德仁明

郭賀字喬卿為尚書令百姓歌之曰厥德仁明郭喬卿  
忠正朝廷上下平

號為清能

呂文字季陽代董允為尚書令庶事無留門無停賓又  
歷職內外治身儉約為政不煩號為清能然持法刻深  
外用俗吏故聲名損於郡縣時

為世名公

晉裴秀為尚書令創制朝儀廣陳刑政朝廷多遵用之以為故事在位四載為當世名公

二令君美

荀彧守尚書令課試令史以下覈其才能有闇於文法不能決疑處事者即時遣出帝嘗謂曰魏武帝言荀文若之進善不進不止荀公達之退惡不退不休二令君之美亦望於君也

三日猶香

荀彧為尚書令持節特堅坐不累席其在臺閣不以私意撓公劉季和嘗曰荀令君至人家坐處三日香

焚毀故案

魏荀彧為尚書令嘗以書陳事臨薨皆焚毀故案奇策密謀不得盡聞非正道不用名重天下莫不以為儀表海內英俊咸宗焉

停滯庶事



蜀費禕字文偉代蔣琬為尚書令時戰國多事衆務煩  
猥禕識寤過人每省讀書記舉目蹙視已究其意旨其  
速數倍於人終亦不忘嘗以朝晡聽事其間接納賓客  
嬉戲博奕每盡人之歡事亦不廢董允代禕為尚書令  
旬日之間事多停滯允乃嘆曰人才力相懸若此非吾  
所及

飛白題壁

宋王僧虔為尚書令為飛白書題尚書壁曰圓行方止

物之定質脩之不已則溢高之不已則躓引之不已則遺是故去之宜疾當時嗟賞以比座右銘

高蟬趨帳

梁何敬容為尚書令專預機密後以罪免職復為金紫光祿大夫未拜又加侍中敬容舊時賓客門生喧譁如昔會稽謝郁致書戒之曰昔君侯納言加首鳴玉在腰回豐貂以步文昌簞高蟬而趨武帳不以此時薦才拔士少報聖主之恩今人猶有踵君侯之門者未必皆感

惠懷仁冀君侯之復用也君侯宜杜門念失無有所通

賜劔書名

鄧壽為尚書令壽為僕射章帝賜諸尚書劔惟壽等三人手自著姓名尚書令韓稜楚龍淵僕射鄧壽

乘車就席

齊謝朓徵為司徒尚書令朓辭脚疾不堪謁仍角巾自輿詣雲龍門既見乘小車就席

儀體玉立

山濤啟事尚書令李膺遷處缺宜得其人征南將軍羊祜體儀玉立可以整肅朝廷

尖頭筆公

後魏古弼為尚書令太武大閱將校獵於河西弼留守詔以肥馬給騎人弼命給弱者太武大怒曰尖頭奴敢裁量朕也還臺先斬此奴弼頭尖太武常名之曰筆頭時人呼為筆公屬官惶怖懼誅弼告之曰吾謂事君使田獵不過盤遊其罪小也不備不虞使我寇恣逸其罪

大也今北狄孔熾南虜未滅狡焉之志窺伺邊境是吾憂也故選肥馬備軍實為不虞之慮苟使國家有利吾寧避死乎太武聞而嘆曰有臣如此國之寶也

何為復讓

晉王述每得官無所辭為尚書令子坦之勸讓述曰汝言我不堪邪坦曰非也但克讓自是美事耳述曰既云堪何為復讓

復表不受

唐代宗以郭子儀為尚書令子儀讓以太宗昔居此官  
累聖相承曠而不置詔不允勅令宰相百官於尚書省  
送上子儀復表讓不受

空函忤意

桓溫素忌殷浩因其北征軍敗乃上疏請擯浩於荒裔  
竟坐廢為庶人後溫復欲以浩為尚書令遺書告之浩  
欣然許之將答書慮有謬誤開閉者數十竟達空函大  
忤溫意由是遂絕

書名見嘲

何敬容為尚書令貪恠為時所嗤鄙其書名敬字則大作苟小為文容字則大為父小為口陸陸戲之曰公家苟既竒大父亦不小敬容遂不能答又為漏禁中語故嘲謂日至嘗有客姓吉敬容問卿與郗吉遠近客答曰如明公之與蕭何

古今文集

雜著


除呂蒙正尚書僕射制

邦國政治蓋出於中樞朝廷紀綱盡歸於會府矧乃端揆之任聿居師長之崇苟非台鉉之賢曷慰搢紳之望具官呂蒙正挺生英氣符合昌期自先夢卜之求遂荷鹽梅之寄謨明匪懈亮直不渝爰自天官再持政柄洎和鼎實時維老成朕欽若丕圖建用皇極雖彌綸大體固未協於康哉而勵翼小心亦備觀於勤止頗鬱隆年之望宜均勞逸之功長是中臺式茲百辟



行尚書省

見後  
省



古今事類聚新集卷四